

DOMINGU III PÁSKUA – TINAN A

Tema

Liturjia domingu ne'e nian konvida ita atu deskobre Kristu moris no moirs-hi'as ne'ebé akompaña ema sira iha dalan sira mundu nian; Kristu, ne'ebé ho Ninia Liafuan anima fuan kanek no dezanimadu sira, ne'ebé hatudu nafatin nia An bainhira komuidade dixípulu sira-nian halibur malu atu "silu paun"; liturjia mós apela atu dixípulu sira sai sasin moris-hi'as nian iha ema sira nia oin.

Iha *Evanjellu*, mak mensajen ne'e hatudu momoos. Iha testu ohin nian, ita haree Kristu moris-hi'as, la'o iha dixípulu sira nia sorin, esplika ba sira Eskritura, hakonu sira-nia fuan ho esperansa no tuur ho sira iha meza atu "silu-fahe paun". Iha momentu ne'e mak dixípulu sira rekoñese Nia.

Iha *leitura dahuluk* hatudu (liuhusi Jezus nia istória) oinsá husi domin ne'ebé sai don ba Maromak no ba maun-alin sira, mosu mai resurreisaun no moris foun; no konvida komuidade Jezús nian atu fó sasin kona-ba realidade ne'e iha ema sira nia oin.

Leitura daruak konvida atu kontempla ho matan, atu haree Maromak nia projetu salvasaun, Maromak nia domin ba ema sira (hatudu iha Jezús nia krús no iha resurreisau). Hodi haree Maromak nia domin boot oinsá, ita aseita Ninia apelu ba moris foun.

LEITURA I – Apóst. 2,14.22-33

Ita iha loron Pentekostes, iha Jerusalém. Komuidade sarani, nakfilak an hodi Espíritu nia kbiit, husi tiha seguransa senákulu nian no prepara an atu fó sasin kona-ba Jezús, iha Jerusalém no to'o mundu nia rohan. Iha kontestu ne'e, Lucas tau iha Pedro niaibun – portavós sira Na'in Sanulu nian – diskursu ida ne'ebé sai anúnsiu dahuluk Jezús nian ("kerigma") ba makhorik sidade nian no ema hotu ne'ebé iha ne'ebá atu selebra festa "Shavu'ot" ("Pentekostes" – liutiha loron 50 festa Páskua, iha ne'ebé judeu oferese ba Maromak produhu foun rai nian. iha época neo-testamentária, povu judeu selebra "aliança: no, liuliu don Lei nian iha foho Sinai).

Diskursu ne'e la'ós reproduisaun istória husi diskursu ida Pedro halo iha senákulu; diskursu ne'e autór Apóstolu sira nia Hahalok mak halo, no iha nia laran ita hetan, parte ida pregasaun ne'ebé komuidade sarani primitiva halo kona-ba Jezús.

Diskursu ne'e hanesan loloos ho diskursu seluk iha Apóstolu sira nia Hahalok (kf. Apóst. 3,12-26; 4,8-12; 10,34-43; 13,16-41). Iha laran iha fórmula kerigma primitivu: apresentasaun lais Jezús nia atividade nian, anúnsiu ninia mate no moris-hi'as no salvasaun.

MENSAJEN

Dadus fundamentál rua ita hetan iha katekeze sarani tempu dahuluk nian: Jezús liu iha mundu hodi halo jestu sira ne'ebé fó sasin kona-ba Maromak nia dinámika no proposta salvasaun ba ema sira (vers. 22); Jezús nia proposta xoke ho mundu nia rekuza no sira oho nia iha krús (vers. 23); maski nune'e, Maromak halo Nia moris hi'as, hodi hatudu katak vida ida saran ba ba servisu projetu Maromak nian la remata ho frakasu, maibé lori ba resurreisaun, ba moris nakonu (vers. 24). Pedro mak portavós komuidade ne'e nian ne'ebé fó sasin oferta

salvasaun nian ne'ebé Jezús lori no nia simu husi Jezús misaun atu haklaken ba ema rai tomak nian.

Anúnsiu dahuluk ne'e dirije ba judeu sira ne'ebé koñese Eskritura no Maromak nia promesa sira. Tanba ne'e, Lucas uza argumentu hasai husi Eskritura atu apresenta katekeze kona-ba Jezús. Iha konkreto, Lucas temi salmu 16,8-11 (vers. 25-28), hodi atribui ba David: ne'e mak testu ida Testamentu Tuan nian iha ne'ebé ita haree moris manán mate. Autór nia diskursu mak ne'e: David ko'alia kona-ba Jahweh nia "belun" ne'ebé sei manán mate; konserteza la'ós David rasik basá nia mate... "Belun" ne'e mak David nia dexendente ida ne'ebé, tuir Maromak nia promesa, sei kaer nia aman nia ukun no estabelese reinu ida rohan-laek (kf. 2Sm 7,12-16). Judeu sira hanaran nia "Mesias" (Maromak kose mina ba nia); nia mak liurai, dexendénsia David nian, ne'ebé judeu sira hein ho laran-metin. Konkluzau klaru liu: Jezús mak manán mate; tan ne'e, Nia mak David nia oan, erdeiru ba tronu ideál David nian, Mesias ne'ebé ema hein.

Tan ne'e, iha-ne'e ita iha, sasin komunidadade sarani ida nian kona-ba Jezús-Mesias, ne'ebé haruka iha mundu atu kumpre Maromak nia planu – katak liberta ema no lori hikis Reinu ida justisa nian, rahun-di'ak nian, dame nian. Jezús nia vitória ba mate no ninia ezaltasaun atesta katak nia mak Mesias Maromak haruka ba ema sira. Sarani sira mak sasin kona-ba ne'e iha mundu, Sasin hahú husi Jerusalém; maibé Lucas haktuir iha Livru Apóstolu sira nia Hahalok oinsá, forma anúnsiu nian kona-ba Jezús sei konkista mundu, hodi to'o ba sentru impériu nian (Roma).

LEITURA II – 1 Pedro 1,17-21

Ita haree ona iha domingu kotuk katak Surat dahuluk Pedro nian mak surat ida dirije ba sarani sira provínsia romana lima Ázia Menór nian, provavelmente iha parte finál sékulu I (karik iha tinan 80). Konunidade sira-ne'e mak komunidadade meiu rurál nian, kiak no iha perigu, moris iha kontestu ostilidade hasoru sarani sira. Persegisaun maka'as no violenta organiza husi Domiciano (masakre, tortura no terus maka'as ba sarani sira) besik daudaun ona (dékada 90). Iha kontestu ne'e, autór Surat nian husu fiar-na'in sira atu mantein fidelidade ba fiar, maski hasoru ostilidade atuál no terus abanbairus nian. Nia konvida sira atu hateke ba Kristu, ne'ebé liu husi esperiénsia paixaun no krús, molok tama iha resurreisaun; no husu sira atu mantein esperansa, domin, solidariedade, hodi moris iha ksolok, koerénsia no fidelidade ba opsaun sarani.

MENSAJEN

Ita-nia testu mak ezortasaun ida atu moris iha santidade ("moris iha hamta'uk"; Testamentu Tuan, define "hamta'uk" nu'udar obediénsia, konfiansa, saran an ba Maromak) "durante tempu ezíliu nian iha mundu ne'e" (vers.17).

Razaun konvite atu moris iha santidade ba fiar-na'in sira: Maromak selu ona ho folin boot atu manán sira husi moris tuan ... no nia la selu ho osan mutin eh mean maibé, ho Kristu nia raan folin liu, suli iha krús.

Autór uza iha kontestu ne'e verbu "lytróô". Verbu ne'e uza iha mundu gregu atu hateten libertasaun atan ida nian, liuhusi pagamentu osan. Iha Testamentu Tuan, verbu ne'e uza atu hateten libertasaun ne'ebé Jahwéh lori to'o rohan ba ninia Povu, moris atan iha Ejitu (kf. Dt 7,8; 15,15), husi ezíliu babilóniku (kf. Es 41,14; 43,1) eh husi salan (kf. Sal 130,8). Iha pasajen ruma, signifika selu, ideia redensaun nian: Jahwéh sosa Israel atu nia sai Maromak nia Povu (kf. 2 Sm 7,23; 1 Cr 17,21). Dehan Maromak "selu", la signifika ideia "pagamentu"

nian, maibé signifika subliña kestaun libertasaun nian: Maromak, iha nia domin, hasai Israel husi moris-atan no salan nian no halo nia sai Povu ida konsagra tomak ba Ninia servisu. Iha ambiente ne'e mak ita buka komprende afirmasaun autór Surat Dahuluk Pedro nian. Aliás, tipolojia Ézodu nian/libertasaun refere momoos (vers. 19) ba "bibli-oan sala-laek (kualidade bibli-oan páskua nian tuir Ex 12,5), ne'ebé fó hanoin kona-ba kalan libertasaun nian husi moris-atan iha EJitu. Kestaun mak ne'e: Maromak hadomi ema tebes duni to'o haruka nia Oan rasik ho proposta salvasaun no moris foun nian. Egoízmú no salan la simu proposta salvasaun no oho Jezús: ne'e mak folin/presu Maromak nia domin nian no Ninia hakaran atu halo ita to'o ba moris nakonu. Maibé Jezús nia mate la leet de'it: husi Ninia fidelidade ba Aman nia misaun, husi Ninia don moris nian, moris mai comunidade ema foun sira nian, ne'ebé hakohak Jezús nia proposta no aseita atu la'o ba moris nakonu.

EVANJELLU – Lc 24,13-35

Istória domingu ohin nian ne'e Lucas de'it mak apresenta. Tuir autór testu nian, dixípulu na'in rua, iha loron Páskua nian, la'o husi Jerusalém ba Emaús (kilómetru 12. Lokalidade ne'e ita la hetan loloos iha ne'ebé...

Komentadór sira destaka kona-ba signifikadu teolójiku relatu ne'e nian, katak katekeze ida kona-ba Jezús. Buat ne'ebé importante ba autór la'ós relatu lójiku no koerente, fiél fa faktu konkretu, maibé esplika ba sarani sira (dékada 80 nian) oinsá sira bele deskobre katak Jezús moris no katak sira bele halo esperiénsia enkontru nian ho Jezús moris no moris-hi'as.

MENSAJEN

Uluknanai, ita iha dixípulu na'in rua ne'ebé bá Emaús. Ida naran Cléofas; no ida fali la identifika nia naran (karik Lucas hakarak atu ita identifika ita-nia an ho ida ne'ebé la iha naran). Sira rua triste no dezanimadu, basá sira-nia mehi hetan poder no naran-boot, sai rahun ho Jezús nia krús. Mesias ho kbiit atu halakon opresór sira, ho kbiit atu lori fali David nia ukun no fahe soim no onra ba ninia kolaboradór diretu sira, afinál, "bluff" ida de'it, frakasu boot ida. Envezde hatudu nia glória, nia husik ema hedi nia ba krús; no nia mate tebes duni, basá liu ona loron tolu mak ema oho nia (loron datoluk liutiha mate mak loron mate definitivu, labele fila hikis ona husi rate). Dixípulu rua ne'e husik comunidade, no fila ba sira-nia knua, prontu atu haluha sira-nia mehi, no hamriik ho ain metin iha rai hodi enfrenta filafali, moris ida ne'ebé susar no laho esperansa.

Hafoin, autór introdús personajen foun: Jezús. Nia sai sira nia maluk viajem nian, husu sira kona-ba sá loos mak akontese iha loron hirak ne'e iha Jerusalém, rona sira-nia preokupasaun, sai sira-nia konfidente iha frustrasaun laran.

Mane na'in rua ne'e haktuir istória "mestre" nian ne'ebé dada sira ho Ninia proposta; maibé sira-nia istória remata iha rate: falta, iha sira-nia istória fiar iha Na'i moris-hi'as – maski sira rona kona-ba rate mamuk.

Atu hatán ba dixípulu na'in rua ninia laran-susar no atu hatudu Maromak nia projetu ne'ebé la liuhusi kadru glória ema nian, maibé husi domin to'o saran an rasik, Jezús hahú atu esplika ba sira Eskritura hotu ne'ebé ko'alia kona-ba Nia.

Hodi rona no fahe Liafuan, hodi medita hodi simu esplikaun no hakohak Liafuan, mak ita bele hetan sentidu kona-ba Maromak nia planu salvasaun: fiar-na'in bele komprende katak domin to'o saran an rasik la'ós frakasu maibé fini moris nakonu nian. Ne'e mak Maromak nia lójika. Halo nune'e, dixípulu sira komprende katak "mesias tenke terus buat ne'e hotu atu tama iha glória": moris nakonu no definitivu – tuir Maromak nia eskema sira – la hetan iha susesu umanu sira, iha tronú, iha poder; maibé iha servisu simples no iha haraik an ba maun-

alin sira, iha don moris nian tan domin, iha partilla totál ita-nia an rasik no ita-nia soin nian ba maluk sira ne'ebé la' o hamutuk ho ita tuir dalan moris nian.

Sira na'in tolu (Jezús, Cléofas no dixípulu seluk) to'o iha Emaús. Sira ladauk rekoñese Jezús, maibé konvida Nia atu hela ho sira. Nia aseita no sira tuur hale'u meza. Enkuantu sira han, Jezús “foti paun, fó bensan, silu fahe no fó ba sira”. Liafuan Lucas uza atu haktuir Jezús nia jestu sira mak selebrasaun eukarístika Igreja primitiva nian. Lucas fó hanoin ba membru sira ninia comunidade nian katak sira bele hasoru Jezús moris-hi'as – Jezús ne'ebé enfrenta krús, maibé kontinua sai ita-nia maluk iha dalan sira istória nian, prezente iha ita leet – iha selebrasaun eukarístika domingu nian.

Ilusnian dixípulu na'in rua fala fali ba Jerusalém no haklaken ba maun-alin sira katak, tebes duni, Jezús moris hi'as.

Bainhira Lucas hakerek ninia Evanjellu (dékada 80), comunidade sarani hasoru difikuldade ruma. Tinan 50 liu ona husi Jezús nia mate, iha Jerusalém. Katekeze hateten katak Nia moris; maibé iha moris baibain ne'ebé monótonu, kole no nakonu ho difikuldade, difisil halo esperiénsia ne'e. Sasin sira e'ebé haree ho matan Jezús moris-hia's, mate hotu ona no akontesimentu sira paixau, mate no moris-hi'as la tuir lójika no la'ós buat ruma réal. “Se Jezús moris hi'as, oinsá mak ha'u bele hasoru Nia? Iha-ne'ebé no oinsá ha'u bele halo esperiénsia réal ho Jezús ne'ebé manán mate? Tanba sá mak Nia la mosu ho forma glória nian no la harii reinu ida glória no poder nian, halo ita manán ita-nia opresór sira no funu-balu sira?” – fiar-na'in sira comunidade Lucas nian husu.

Ba lia-husu sira-ne'e mak katekista Lucas buka hatán. Ninia mensajen dirije ba fiar-na'in sira ne'ebé la'ó tuir dalan moris nian ho dezánimu no la hatene atu bá ne'ebé loos, iha monotonia no difikuldade sira moris loroloron nian.

Lucas dehan: ita ema sira, bele iha mehi boboot kona-ba Maromak nia intervensaun iha istória umana; maibé buat sira-ne'e la'ós eskema Maromak nian... La'ós iha intevensaun boboot mak ita hasoru Jezús ne'ebé moris. Maski nune'e, Nia moris no la' o iha ita-nia sorin iha dalan sira mundu nian. Dalaruma, ita la konsege rekoñese Nia, basá ita-nia fuan nakonu ho perspetiva laloos kona-ba Nia, kona-ba Ninia métodu sira no kona-ba saida mak Nia hakarak. Nia kontinua sai ita-nia maluk viajem nian, habiit ita ho esperansa mai husi Ninia Liafuan, halo ita hasoru Nia iha partilla komunitária paun nian (Eukaristia).

Iha katekeze Lucas nian ita haree liuliu, ideia katak iha selebrasaun komunitária Eukaristia nian mak fiar-na'in sira halo esperiénsia enkontru ho Jezús moris no moris-hi'as. Ita-nia narraun apresenta eskema litúrjiku selebrasaun eukaristia nian: liturjia Liafuan nian (esplikasaun Eskritura nian – ne'ebé tulun dixípulu sira komprende lójika Maromak nia planu nian kona-ba Jezús) no “silu-fahe paun” (ne'ebé halo dixípulu sira tama iha komuñau ho Jezús, simu husi Nia moris no rekoñese iha jestu sira-ne'e Jezús nia saran an totál ba ema sira).

Mensajen ikus: depoizde halo esperiénsia enkontru moris nian ho Kristu moris no moris-hi'as iha selebrasaun eukarístika, fiar-na'in ida-idak, hetan konvite atu fila hikas, halo fala dalan hodi bá hasoru maluk sira no fó sasin katak Jezús moris no horik iha istória no iha ema sira nia dalan.